

**VENDIM**  
**Nr. 969, datë 2.12.2020**

**PËR PËRCAKTIMIN E KRITEREVE E TË PROCEDURAVE TË ZGJEDHJES SË ANËTARËVE TË KËSHILLIT KOMBËTAR TË RINISË, SI DHE TË MËNYRËS SË ORGANIZIMIT E TË FUNKSIONIMIT TË TIJ**

Në mbështetje të nenit 100 të Kushtetutës dhe të pikës 3, të nenit 9, të ligjit nr. 75/2019, “Për rininë”, me propozimin e ministrit të Arsimit, Sportit dhe Rinisë, Këshilli i Ministrave

**VENDOSI:**

1. Përcaktimin e kriterëve e të procedurave të zgjedhjes së anëtarëve të Këshillit Kombëtar të Rinisë (në vijim KKR), si dhe të mënyrës së organizimit e të funksionimit të tij.

2. KKR-ja përbëhet nga 16 (gjashtëmbëdhjetë) anëtarë, nga të cilët, të paktën 5 (pesë) janë femra. Anëtarët e KKR-së janë, si më poshtë vijon:

- a) ministri përgjegjës për rininë, kryetar;
- b) titullari i Agjencisë Kombëtare të Rinisë (AKR);
- c) 2 (dy) përfaqësues nga Agjencia për Mbështetjen e Vetëqeverisjes Vendore;
- ç) 8 (tetë) përfaqësues nga organizatat rinore dhe/ose për të rinjtë;
- d) 4 (katër) përfaqësues anëtarë të këshillave studentorë.

3. Mandati i anëtarëve të KKR-së është dyvjeçar, me të drejtë riemërimi.

4. Anëtari i KKR-së mund të japë dorëheqjen në çdo kohë, duke njoftuar me shkrim kryetarin. Anëtari i dorëhequr është i detyruar të përmbushë të gjitha detyrimet e lëna deri në miratimin e urdhrin të ndryshimit.

5. Anëtarët e KKR-së duhet të deklarojnë çdo rast të konfliktit të mundshëm të interesit, në përputhje me legjislacionin në fuqi.

6. Anëtarët e KKR-së kryejnë detyrën e tyre bazuar në parimin e mosdiskriminimit, të meritës, transparencës e gjithëpërfshirjes.

7. Kandidati për anëtar i KKR-së, përfaqësues i organizatave rinore, duhet të plotësojë këto kritere:

a) të ketë dhënë kontribut në fushën e rinisë të paktën për 2 (dy) vitet e fundit, nëpërmjet projekteve me fokus rininë apo të zhvillimit të nismave ose të aktiviteteve për promovimin e të rinjve;

b) të mos jetë i dënuar me vendim gjyqësor të formës së prerë;

c) të mos ketë konflikt interesi në përmbushje të kërkesave dhe dispozitave ligjore.

8. Kandidati për anëtar i KKR-së, jo përfaqësues i organizatave rinore, duhet të plotësojë këto kritere:

a) të mos jetë i dënuar me vendim gjyqësor të formës së prerë;

b) të ketë përvojë pune në fushën e zhvillimit apo të zbatimit të aktiviteteve rinore, apo të ketë qenë pjesë e nismave ose aktiviteteve për promovimin e të rinjve;

c) të mos ketë konflikt interesi në përmbushje të kërkesave dhe të dispozitave ligjore në fuqi.

9. Kandidati, për t'u emëruar anëtar i KKR-së, duhet të paraqesë, përkatësisht, dokumentacionin si vijon:

a) kandidati, përfaqësues i organizatave rinore dhe/ose për të rinjtë:

i. kërkesën;

ii. jetëshkrimin;

iii. fotokopje të dokumenteve që vërtetojnë jetëshkrimin;

iv. vërtetimin e gjendjes gjyqësore ose vetëdeklarimin e saj;

v. vetëdeklarimin e konfliktit të interesit.

- b) kandidati, jo përfaqësues i organizatave rinore:
  - i. kërkesën;
  - ii. jetëshkrimin;
  - iii. fotokopje të dokumenteve që vërtetojnë jetëshkrimin;
  - iv. vërtetimin e gjendjes gjyqësore ose vetëdeklarimin e saj;
  - v. letër motivimi;
  - vi. vetëdeklarimin e konfliktit të interesit.

10. Thirrja për kandidatët e përmendur në shkronjat “ç” dhe “d”, të pikës 2, të këtij vendimi, publikohet në faqen zyrtare të Agjencisë Kombëtare për Rininë (AKR) për një periudhë prej 30 (tridhjetë) ditësh. Votimi përzgjedhës kryhet në formë elektronike në faqen zyrtare të AKR-së, brenda 10 (dhjetë) ditëve nga data e fillimit të procesit të votimit.

11. KKR-ja mbledhet jo më pak se 2 (dy) herë në vit. Mbledhjet thirren e drejtohen nga kryetari. Sekretariati teknik njofton anëtarët e KKR-së, të paktën 7 (shtatë) ditë përpara datës së përcaktuar për mbledhjen.

12. Mbledhja e KKR-së zhvillohet kur janë të pranishëm të paktën gjysma e anëtarëve të tij.

13. KKR-ja mbështetet nga sekretariati teknik, i cili përbëhet nga tre anëtarë. Caktimi i anëtarëve të sekretariatit teknik e procedura e thirrjes së mbledhjes apo elemente të tjera për funksionimin e KKR-së përcaktohen në rregulloren e brendshme, e cila miratohet nga ministri përgjegjës për rininë.

14. Në çdo mbledhje të KKR-së mbahet procesverbali që pasqyron të gjitha diskutimet gjatë mbledhjes. Procesverbali nënshkruhet nga çdo pjesëmarrës në mbledhjen përkatëse të KKR-së.

15. Mandati i anëtarit të KKR-së mbaron kur:

- a) përfundon afati dyvjeçar nga data e emërimit;
- b) humbet zotësinë juridike për të vepruar me vendim gjykatë apo dënohet me vendim gjyqësor të formës së prerë;
- c) jep dorëheqjen.

16. Anëtari i Këshillit Kombëtar të Rinisë lirohet nga detyra, para mandatit, nga ministri përgjegjës për rininë, në rastet kur:

- a) nuk paraqitet, pa shkaqe të justifikuara, në të paktën 3 (tri) mbledhje të njëpasnjëshme të KKR-së;
- b) paraqiten shkaqe objektive, që e bëjnë të paaftë për të kryer funksionet e ngarkuara;
- c) nuk përmbush detyrimet si anëtar i KKR-së;
- ç) veprimet apo mosveprimet e tij kanë dëmtuar rëndë veprimtarinë dhe emrin e KKR-së.

17. Anëtari i KKR-së, të cilit i është ndërprerë mandati apo është liruar nga detyra, zëvendësohet nga ministri përgjegjës për rininë me një kandidat që përmbush kriteret e përcaktuara në këtë vendim.

18. Kohëzgjatja e mandatit të anëtarit zëvendësues është sa pjesa e mbetur e mandatit të anëtarit të larguar.

19. Ngarkohet Agjencia për Mbështetjen e Vetëqeverisjes Vendore t'i propozojë ministrit përgjegjës për rininë anëtarët e tyre përfaqësues në Këshillin Kombëtar të Rinisë.

20. Ngarkohet Ministria e Arsimit, Sportit dhe Rinisë, Agjencia Kombëtare e Rinisë (AKR) dhe Agjencia për Mbështetjen e Vetëqeverisjes Vendore për zbatimin e këtij vendimi.

Ky vendim hyn në fuqi pas botimit në Fletoren Zyrtare.

**ZËVENDËSKRYEMINISTËR**  
**Erion Braçe**